



Kursu Promosaun Ofisial Inspetor PNTL
Sei Hamosu Deskontente Barak Liu Duke Motivasaun Servisu

Mahein Nia Lian Nú. 137, 4 Fevereiru 2019



Foto: Serviços Relações Públicas – Ministério do Interior, 2018

Fundasaun Mahein (FM)

Website: www.fundasaunmahein.org

2019



Kontiudu sira

Kontiudu sira	2
Introdusaun	3
Metodolojia	3
Kuadru legal konkursu admisaun KPOI	4
Rekezitu sira KPOI la tuir situasaun real	5
Lisaun husi promosaun anterior	6
Rekomendasauun	8
Bibliografia	9

Introdusaun

Temi kona-bá promosaun iha Polísia Nasional Timor-Leste (PNTL) la sees husi polémika duke satisfasaun husi membru sira. Maske promosaun hanesan orgullu no motivasaun ida ne'ebé institusaun rekuiñese no valoriza membru sira nia prestasaun servisu iha kareira polisiais. Maibe istoria naruk promosaun PNTL nian desde tinan 2010 no 2012 nakonu ho intervensaun política no ho polémika. Ikus mai membru PNTL balu desmotiva, la leal ba nia superior sira no balu diside husik hela nia servisu ka rejign-an husi PNTL¹.

Promosaun ne'ebé akontese iha tinan 2010 no 2012 prova kona-bá ida ne'e no iha altura ne'eba hetan protestu maka'as husi parte oin-oin. Governu no Komandu PNTL komu-metin tiha deit no haree katak ida ne'e hanesan susesu ida husi prosesu reforma ne'ebé la'o iha PNTL nia laran. Los duni ne'e susesu boot ida maibe iha parte ida ierarkia PNTL nian kontinua fraku. Membru PNTL balu kontinua la leal ba nia superior sira tamba sente diskriminadu iha prosesu promosaun ne'e tamba haree liu ba esperiensia polisial. Los duni katak membru PNTL sira mai husi grupu oin-oin durante rekrutamentu ba membru PNTL iha tinan 2000². Maibe insatisfasaun ne'e kontinua la'o to'o agora!

Asuntu promosaun agora fila-fali sai atensaun hafoin Ministériu Interior hasai *Diploma Ministerial N.º 35/2018 de 29 de Novembro* hodi halo promosaun ba membru PNTL sira husi kategoria Sarjentu tuir konkursu admisaun Kursu Promosaun Ofisial Inspetor (KPOI) hodi promove ba postu Inspetor Asistente³. Maske prosesu ne'e foin hahu, insatisfasaun no polémika hale'u ona iha membru PNTL sira husi kategoria sira Sarjentu no Ajente.

Iha kontestu ne'e, relatóriu ida ne'e sei fó observasaun kritiku ida no solusaun sira ba konkursu admisaun KPOI ne'ebé sei mai. Nune'e bele hetan promosaun ida motiva membru sira PNTL duke deskontentementu.

Metodolojia

Métodu ne'ebé adopta iha peskiza ida ne'e nian liu husi revizaun inisial ida ho dokumentu no lejislasaun espesifiku sira kona-bá promosaun PNTL nian no hafoin ramata prosesu ne'e halo mos diskusaun balu ho membru PNTL sira. Ikus liu hodi konklui relatóriu ne'e liu husi métodu ne'ebé Fundasaun Mahein (FM) adopta maka *Security Sector Discussion* (SSD). SSD hanesan métodu diskusaun ne'ebé involve peskizador sira FM nian hodi halo análise, hakerek relatóriu no hato'o rekomendasaun sira husi rezultadu peskiza nian.

¹ Fundasaun Mahein. (2012). Irregularidade iha Promosaun Estraordinariu Polísia Nasional Timor-Leste tinan 2012. Mahein Nia Lian Nú. 85, Setembru 2014. Dili, Timor-Leste

² Fundasaun Mahein. (2010). Rekrutamentu ba PNTL: Dalan Naruk ba Profesionalismu. Mahein Nia Lian Nú. 15. Dezembru 2010. Dili, Timor-Leste

³ Refere ba alinea a) n.º 1 artigu 15 Decreto-Lei N.º 16/2009 de 18 de Março Regime de Promoçao da PNTL



Kuadru legal konkursu admisaun KPOI

Iha Ioron 29 Novembru 2018 Ministériu Interior hasai ona Diploma Ministerial ida hodi estabelese Regulamentu Konkursu Admisaun Kursu Promosaun Ofisial Inspetor (KPOI) Polísia Nasional Timor-Leste nian (PNTL). Konkursu ne'e klasifika hanesan konkursu internu no nakloke ba membru PNTL hotu husi kategoria sira Sarjentu⁴ no aplika tuir aline a) n.º 1 artigu 15 no rekezitu no kondisaun espesiais promosaun nia ba postu Inspetor Asistente ne'ebé mensiona iha Aneksu IV Dekretu-Lei N.º 16/2009 Rejime Promosaun PNTL nia dispozisaun.

Nune'e rekezitu sira admisaun nian maka tuir mai ne'e:

- a) Iha ona kategoria sira Sarjentu,
- b) Kleur ona iha postu ne'e,
- c) Komportamentu diak primeiru klase,
- d) Iha ona nivel akadémika minimu baxarelatu ka ekivalente,
- e) Idade labele liu 50,
- f) Iha kapasidade fízika no psikolojika ne'ebé rekuiñesidu,
- g) La desisti ka konsidera la aptu dala-rua ona iha selesaun sira anterior KPOI nian,
- h) La reprovadu dala-rua KPOI nian iha selesaun sira anterior tambo razaun sira hanesan asidente rumo, moras ka forsa maior seluk ne'ebé impede la partisipa⁵.

Iha diploma ministerial ne'e estabelese mos método sira hodi halo selesaun liu husi prova tékniku-profesional, prova aptidaun fízika, prova psikolojika no prova médica⁶. Iha ne'ebé prosesu ne'e lidera husi ekipa juri ida husi entidade públiku no privadu sira no observa husi ofisiais membru PNTL sira ne'ebé sei hili husi Komandante Jeral PNTL.⁷

Husi dispozisaun *Diploma Ministerial N.º 35/2018 de 29 de Novembro* katak membru PNTL sira ne'ebé iha kategoria sira Sarjentu admite partisipa iha konkursu admisaun KPOI tuir rekezitu sira ne'ebé estabelese ona iha diploma ne'e rasik no artigu 15 Aneksu IV Dekretu-Lei N.º 16/2009 Rejime Promosaun PNTL.

Aneksu IV – Kondisaun Espesial Promosaun Artigu 15 Dekretu-Lei N.º 16/2009 Rejime Promosaun PNTL.

Kategoria sira	Postu sira (tuir orden dekresente)	Rekizitu no Kondisaun Espesiál ba Promosaun ba Postu
Ofisiál Superior	Komisáriu	Nomeia ba kargu Komandante Jerál ka 2º Komandante PNTL nian
	Superintendente Xefe	Iha tinan 4 iha postu Superintendente, no verifika katak iha vaga.
	Superintendente	Iha tinan 4 iha postu Superintendente Asistente, no verifika

⁴ Artigu 2 no 3 Diploma Ministerial N.º 35/2018 de 29 de Novembro

⁵ Artigu 22 Diploma Ministerial N.º 35/2018 de 29 de Novembro

⁶ n.º 1 artigu 13 Diploma Ministerial N.º 35/2018 de 29 de Novembro

⁷ Artigu 7, 8, 9 no 10 Diploma Ministerial N.º 35/2018 de 29 de Novembro

		katak iha vaga
	Superintendente Asistente	Iha tinan 5 iha postu Inspecór Xefe. Selesiona liu husi konkursu. Tuir no iha susesu iha kursu formasaun ba Ofisiál superintendente sira. Iha vaga
Ofisiál Inspecór Segunda entrada esternu	Inspecór Xefe	Iha tinan 5 iha postu Inspecór, no verifika katak iha vaga.
	Inspecór	Iha tinan 5 iha postu Inspecór Asistente, independente husi vaga
	Inspecór Asistente	Selesiona liuhusi konkursu. Tuir no iha susesu iha formasaun ba Inspecór sira, ka Iha postu Sarjentu ho tinan 4 iha postu no tuir no iha susesu iha kursu promosaun ba ofisiál Inspecór sira. Verifika katak iha vaga.
Sarjentu	Sarjentu-Xefe	Iha tinan 6 servisu efektivu iha Postu Primeiru-Sarjentu, verifika katak iha vaga.
	Primeiru- Sarjentu	Iha tinan 6 servisu efektivu iha postu Sarjentu, independente husi vaga
	Sarjentu	Iha tinan 4 iha kategoria Ajente Selesiona liu husi konkursu. Tuir no iha susesu iha kursu formasaun Sarjentu nian. Iha Vaga.
Ajente Primeira entrada esternu	Ajente Xefe	Iha tinan 6 iha postu Ajente Prinsipál
	Ajente Prinsipál	Iha tinan 6 iha postu Ajente
	Ajente	Tuir no iha susesu iha kursu

Rekezitu sira KPOI la tuir situasaun real

Rekezitu KPOI iha leten ne'e tuir Fundasaun Mahein (FM) nia haree sei hamosu deskontente barak liu duke motivasaun servisu husi membru PNTL sira. Tamba rekezitu sira ne'e la tuir situasaun membru PNTL sira nian:

- Membru PNTL sira ne'ebé ho postu Sarjentu maibe nivel edukasaun sekundariu deit ka la hasai kursu ruma sei la partisipa konkursu admisaun ne'e.
- Nune'e mos membru PNTL sira ne'ebé nivel edukasaun baxarelatu ka lisensiadu maibe ho deit postu Ajente sei la partisipa mos iha konkursu ne'e.

Situasaun rua iha leten akontese tumba membru PNTL balu la iha opurtunidade ba eskola ka asesu ba universidade no balu hetan opurtunidade ba eskola maibe la halo promosaun tuir praktika normal sira iha Rejime Promosaun PNTL nian. Exemplu, iha kazu ne'ebé FM identifika Komandante Eskuadra balu ho postu Sarjentu Xefe no membru PNTL sira ne'ebé ho kategoria Sarjentu maibe nivel edukasaun sekundariu deit. Maske sira permanensia iha postu ne'e liu ona tinan 4 (Aneksu IV refere ba artigu 15 Dekretu Lei N.º 16/2009 de 18 de Marsu Rejimentu Promosaun PNTL nian). Maibe rekezitu ne'ebé estabelese iha *Diploma Ministerial N.º 35/2018 de 29 de Novembro* la admite asesu ba konkursu admisaun KPOI. Tamba sira la mai ho kualifikasaun baxarelatu ka lisensiatura.

Ironiku liu-tan membru PNTL balu ne'ebé Komandu PNTL rasik haruka ba eskola liu husi bolsu-estudu no ramata ona ho grau lisensiadu maibe nafatin iha postu Ajente Prinsipal no Ajente Xefe. Exemplu ida husi membru PNTL lubuk ida ne'ebé daudaun ne'e koloka iha Servisu Investigasaun Kriminal (SIK) – PNTL ramata ona kursu lisensiadu iha area kriminolojia husi Nasaun Filipina iha tinan 2015. Maibe to'o agora kontinua ho postu Ajente. Maske Rejime Promosaun PNTL 2009 premite hela hodi promove automatikamente ba postu ne'ebé ekivalensia ho nivel edukasaun ne'ebé sira hetan. Nune'e KPOI ne'ebé sei mai, lisensiadu kriminolojia sira ne'ebé husi bolsu estudu PNTL/Governu nian sei la tuir tamba ho deit postu Ajente.

Ida ne'e hatudu práтика sira ne'ebé la valoriza rekursu sira ne'ebé PNTL rasik prepara. Nune'e nia impaktu sei hamosu deit deskontente husi membru PNTL sira no desmotiva sira nia servisu. Lulos kursu espesializasaun sira nune'e merese promove ba postu ne'ebé ekivalensia ho sira nivel edukasaun tamba koresponde duni ba servisu Institusaun PNTL nian. Exemplu diak promosaun tuir membru PNTL sira nia espesializasaun no méritu ne'ebé akontese iha tinan 2014. Membru PNTL na'in lima ne'ebé ramata kursu espesializasaun iha area medisina husi Nasaun Kuba promove automatikamente tuir Rejime Promosaun PNTL nian sem liu husi testu rumo. Iha ne'ebé Ajente Prinsipal na'in rua promove ba Inspetor Asistente no na'in tolu promove ba Primeiru Sargento.

Iha âmbitu seluk, membru PNTL sira husi kategoria Sargento no Ajente barak liu husi total número PNTL koloka iha munisipiu, eskuadra no suku. Nune'e mos membru sira husi Unidade Patrullamentu Fronteira (UPF) no balu husi Unidade Polisia Maritima (UPM) no Sub-unidade balu hanesan Batallaun Ordem Pública (BOP) husi Unidade Espesial Polisia (UEP) nian iha munisipiu sira ne'ebé dook husi Kapital Dili. Maioria ho deit nivel edukasaun sekundariu tamba susar asesu ba eskola ka universidade hodi hetan grau akadémika baxarelatu ka lisensiadu. Ho ida ne'e sira sei la iha opurtunidade asesu ba konkursu admisaun KPOI ne'ebé sei mai.

Lisaun husi promosaun anterior

Lisaun barak ona husi promosaun sira liu ba. Iha ne'ebé insatisfasaun barak liu duke motiva sira hodi halo servisu. Tamba ne'e rekezitu sira ne'ebé estabelese iha *Diploma Ministerial N.º 35/2018 de 29 de Novembro* presiza haree fila-fali.

a) Lisaun ne'ebé presiza hadi'a

Esperiensia husi promosaun tinan 2010 no 2012 membru PNTL la satisifas ho rezultadu promosaun nian, ikus mai rejigna-an husi PNTL. Iha tinan 2012 Promosaun Estraordinariu Sargento Xefe Sandra do Ceo Maria Costa Bossa rejigna-an husi PNTL tamba rezultadu promosaun estraordinairu desmotiva nian, iha ne'ebé antes ne'e promove tiha ba Inspetor Asistente liu deit fulan tolu hatun fila fali ba postu anterior (Sargento Xefe)⁸. Nune'e mos Inspetor Cesaltina Soares hato'o keixa

⁸ Fundasaun Mahein. (2012). Irregularidade iha Promosaun Estraordinariu Polisia Nasional



ba Ministériu Públiku tamba konsidera rezultadu promosaun la justu. Ofisial ne'e hato'o ba FM katak nia hetan valor testu boot maibe hakat deit pasu ida husi Inspetor Asistente ba Inspetor. Maibe elementu seluk valor testu kiik maibe hakat pasu rua ka tolu no ida promove ba Superintendente Asistente⁹.

Deskontentimentu ba promosaun estraordinariu tinan 2012 la'os deit hato'o reignasaun, halo petisaun no keixa hasoru Komisaun Promosaun maibe impaktu seluk halo membru PNTL balu sai la disciplina. Membru PNTL ida iha Munisipiu Cova-Lima abandona nia servisu no sai ho kilat ho motor Institusaun PNTL nian, bainhira nia la passa ba exame promosaun estraordinariu iha tinan 2012. Pesoal PNTL iha munisipiu refere la tama servisu husi tempu dader no la tuir formatura hanesan atividade regular ida ne'ebé PNTL kada munisipiu halo iha sira nia komandu no sira nia membru sira seluk. Pesoal PNTL ida ne'e ema ida husi membru PNTL barak ne'ebé la satisfas ba prosesu promosaun ne'ebé Governu aplika no kondus husi Komisaun Promosaun Estraordinariu. Ofisial PNTL ne'e mos eis-veteranus ida. Maske altura ne'eba promosaun estraordinariu fó prioridade ba veteranus sira hodi hetan promosaun maibe barak husi ne'e la hetan promosaun¹⁰.

b) Lisaun ne'ebé kontinua no dudu profesionalismu

Promosaun tuir membru PNTL sira nia espesializasaun no méritu ne'ebé akontese iha tinan 2014. Membru PNTL na'in lima ne'ebé ramata kursu espesializasaun iha area medisina husi Nasaun Kuba promove automatikamente tuir Rejime Promosaun PNTL nian sem liu husi kualker testu ruma. Iha ne'ebé Ajente Prinsipal na'in rua promove ba Inspetor Asistente no na'in tolu promove ba Primeiru Sarjentu.

Lisaun sira nune'e nu'udar promosaun ida ne'ebé bazeia ba modalidade meritu no kapasidade intelektual. Duke promosaun ida ne'ebé ninia tendensia política (kondisaun espesifika). Katak promosaun ne'ebé bazeia ba membru ida halo saida no atinji buat ruma tuir nesesidade institusaun nian ho ninia profesionalismu.

Tamba ne'e desde promosaun sira anterior FM rekomenda ona katak presiza hadi'a Rejime Promosaun PNTL 2009. Ikus mai sai mos prioridade ba Komandu Jeral PNTL nian atu halo revizaun ne'ebé hatuur mos iha Planu Estratégiku PNTL 2014-2018 Objetivu Estratégiku 1 Lejislasaun 1.12. Maibe desde Planu Estratégiku PNTL ne'e pasa iha tinan 2014 to'o nia implementasaun ramata ona iha tinan 2018. Objetivu Estratégiku 1 Lejislasaun 1.12 revizaun ba Rejime Promosaun PNTL nafatin hela iha surat tahan leten ka la implementa.

⁹ Timor-Leste tinan (2012). Mahein Nia Lian Nú. 85, Setembru 2014. Dili, Timor-Leste. p12

¹⁰ Fundasaun Mahein. (2012). Irregularidade iha Promosaun Estraordinariu Polísia Nasional Timor-Leste tinan 2012. Mahein Nia Lian Nú. 85, Setembru 2014. Dili, Timor-Leste. p12

¹⁰ Fundasaun Mahein. (2012). Irregularidade iha Promosaun Estraordinariu Polísia Nasional Timor-Leste tinan 2012. Mahein Nia Lian Nú. 85, Setembru 2014. Dili, Timor-Leste. p11



Rekomendasau

1. Rekomenda ba Ministériu Interior no Komandu Jeral PNTL haree fila-fali rekezitu sira konkursu admisaun KPOI tuir realidade membru PNTL sira nian ne'ebé identifika ona iha leten. Nune'e bele evita polémika no insatisfasaun husi membru PNTL sira no impaktu sira ba servisu PNTL nian.
2. Rekomenda ba Komandu Jeral PNTL fó prioridade promosaun ba membru PNTL sira ne'ebé ramata ona kursu espesializasaun iha ne'ebé rekursu ne'ebé PNTL rasik prepara liu husi bolus estudu iha rai laran no rai liur hodi partisipa iha konkursu admisaun KPOI.
3. Rekomenda ba Ministériu Interior no Komandu Jeral PNTL haree fila-fali Rejime Promosaun PNTL 2009 no tau iha prioridade revizaun lejislasaun nian iha Planu Asaun Anual PNTL nian.



Bibliografia

Decreto-Lei N.^o 16/2009 de 18 de Março, Regimento de Promoção da PNTL

Decreto-Lei N.^o 22/2012 de 24 de Maio, Período Extraordinário de Promoções na PNTL

Diploma Ministerial N.^o 35/2018 de 29 de Novembro

Fundasaun Mahein. (2012). Irregularidade iha Promosaun Estraordinariu Polísia Nasional Timor-Leste tinan 2012. Mahein Nia Lian Nú. 85, Setembru 2014. Dili, Timor-Leste

Fundasaun Mahein. (2010). Rekrutamentu ba PNTL: Dalan Naruk ba Profesionalismu. Mahein Nia Lian Nú. 15. Dezembru 2010. Dili, Timor-Leste

PNTL. (2014). Planu Estratéjiku Polísia Nasional Timor-Leste 2014-2018. Dili, Timor-Leste